

В СРЕДУ 5-Й СЕДМИЦЫ ПО ПАСХЕ

Во вторник пятыя седмицы по Пасце вечера,

На Господи воззвах: поставим стихов, 6. И поем стихиры Преполовению 3, повторяюще я. Глас 4-й:

Подобен: Господи, возшед на Крест:

Наста преполовление дней, от спасительнаго начинаемых востания, Пятидесятницею же Божественною печатаемое, и светится светлости обоюдо имущее, и соединяющее обоя, и приити славе предъявляющее, Владычняго Вознесения предпочитает. [Дважды]

Слыша и возвеселися Сион, благовестившуся Христову Воскресению: вернии же его сынове возрадовашася Сего видевши, и омывающа Духом скверну христуобийства: готовится торжествующи, обоих веселое преполовление. [Дважды]

Приблизися Божественнаго изобильное излитие на всех, якоже написася, Духа: предузаконение проповедует преполовившееся, по Христове смерти и погребении и Воскресении, от Него данну сущу учеником, неложному обещанию, Утешителево показующу явление. [Дважды]

Слава, и ныне глас 6-й:

Празднику преполовляющуся, Твоего Христе Воскресения, и Божественнаго пришествия Святаго Твоего Духа, сопедшеся чудес Твоих воспеваем таинства, воньже низпосли нам велию милость.

На стиховне самогласны, глас 1-й:

Пятидесятницы наста дней преполовление, в немже Христос обнажив маловидно Божественную силу, разслабленнаго стягну словом, того от одра возставив, и боголепно чудотворяй в зданном теле, человеком дарова вечный живот, и велию милость.

Стих: Помяни сонм Твой, егоже стяжал еси исперва.

Во святилище пришел еси Премудросте Божия, преполовляющуся празднику, уча и обличая непокоривыя иудеи, фарисеи и книжники, и вопия со дерзновением к ним: жаждай да грядет ко Мне, и пьет воду животную, и не вжаждет во век: веруй Моей благодати, реки потекут из чрева его жизни вечныя. О благодати и благоутробия Твоего Христе Боже наш, слава Тебе!

Глас 2-й:

Стих: Бог же Царь наш прежде века, содела спасение посреде земли.

Егда преполовление праздника наста, взыде Иисус во святилище, и учаше непокоривыя иудеи, глаголя: жаждай да грядет ко Мне, и пьет воду животную, вечную, и не вжаждется во век. Веруй в Мя, реки потекут из чрева его, и имети будет свет животный.

Слава, и ныне: глас 8-й:

Преполовившуся празднику, учащу Ти Спасе, глаголаху иудее: како Сей весть писмена, не учився? Не разумеюще, яко Ты еси Премудрость устроившая мир, слава Тебе.

По Ныне отпускаеши: и по Отче наш:

Тропарь празднику, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

Слава, и ныне, тойже:

Ектения, и отпуст.

В СРЕДУ 5-Й СЕДМИЦЫ ПО ПАСХЕ
В СРЕДУ ПЯТЫЯ СЕДМИЦЫ ПО ПАСЦЕ НА УТРЕНИ,

На Бог Господь: Тропарь, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе. [Трижды.]

По 1-й стихологии седален, глас 4-й:

Наста Преполовление дней от Спасительнаго начинаемых Возстания, Пятидесятницею же Божественною печатаемое, и светится, светлости обоюду имущее и соединяющее обоя, и приити славе предъявляющее, Владычняго Вознесения предпочитает.

Слава, и ныне, тойже:

По 2-й стихологии седален, глас 4-й:

Слыша и возвеселися Сион, благовестившуся Христову Воскресению, вернии же его сынове возрадовахся, сего видевши, омывающа духом скверну христубийства, готовится, торжествующе, обоих веселое Преполовление.

Слава, и ныне, тойже:

Воскресение Христово видевши, * поклонимся Святому Господу Иисусу, * Единому Безгрешному. * Кресту Твоему покланяемся Христе, * и Святое Воскресение Твое поем и славим: * Ты бо еси Бог наш, * разве Тебе иного не знаем, * Имя Твое именуем. * Приидите вси вернии, * поклонимся Святому Христову воскресению: * се бо прииде Крестом радость всему міру. * Всегда благословяще Господа, * поем Воскресение Его: * распятие бо претерпев, * смертию смерть разруши.

По 50-м псалме Канон 1-й, глас 4-й

И каноны 4-го гласа, со ирмосом на 8: и осмаго гласа, на 6. Кондак, и икос, и ексапостилярій праздника.

Песнь 1.

Ирмос: Моря Чермнаго пучину, * немокрыми стопами * древле шествовав Израиль, * крестообразно Моисеовыма рукама, * Амаликову силу в пустыни победил естъ.

Запев: Слава Тебе Боже наш, слава Тебе

Велия яже паче ума, Твоего Владыко божественнаю воплощения благодеяния сияют нам, дарове же и благодати, и божественныя светлости, благоподатно истекают.

Пришел еси Христе, светлости Божества испущая, праздника посреди явленно: праздник бо радостен спасаемым еси, и спасения нашею ходатай.

Премудрость и правда, Господи, и избавление, от Бога Ты бысть нам, и от земли к небесней приводя высоте, и Дух Божественный даруя.

Богородичен: **П**лоть Твоя истления во гробе не виде Владыко, яко составися кроме семени, тления не прият исследованием естества, пресущественне, не работавши.

Канон 2-й, глас 8-й

Ирмос: **М**оре огустил еси, * погрузивый со оружием гордаго фараона, * и люди спасл еси немокренно Господи, * и ввел еси я в гору святыни, вопиющая: * поим Тебе Богу нашему песнь победную, яко прославися.

Языцы воспещите, евреи восплачите, животодавец бо Христос, узы адовы расторже, и мертвыя воскреси, и недуги исцели словом: Сей есть Бог наш, давый жизнь верующим во имя Его.

Чудо показал еси, воду в вино прешедшую, во Египте реки преложивый, Владыко, в кровь, и мертвыя воскресил еси, знамение сие второе скончав. Слава, Спасе, несказанному Твоему совету: слава истоцанию Твоему, имже обновил еси нас.

Струя приснотекущая сый, Господи, жизни истинныя, Ты еси воскресение наше, хотя трудился еси, Спасе мой, и волею вжаждался еси, законом естества повинуюся, и в Сихарь шед плотину, воды просил еси у самаряныни пити.

Хлебы благословил еси, рыбы умножил еси, непостижимый Боже, и люди насытил еси независтно, и источник приснотекущий, премудрость, жаждущим обещал еси. Ты еси Спас Бог наш, давый живот верующим во имя Твое.

Слава, Троицен: **Т**ри собезначальны славою и сопрестольны, Отца безначальна Бога, и Сына собезначальна, и Духа соприисносущна Сыну, едино триипостасное Существо, едино начало пребезначальное пою, безначальнаго Божества и Существа чту.

И ныне, Богородичен: **Е**дина вместила еси Зиждителя Твоего, Богородительнице, во чреве, и плотию родила еси неизреченно, и Дева пребыла еси, ничтоже девству осквернившися. Сего, Чистая, яко Сына Твоего и Бога непрестанно моли о стаде Твоем присно.

Песнь 3.

Ирмос: **В**еселится о Тебе церкви Твоя Христе зовущи, * Ты ми крепость Господи, * прибежище и утверждение.

Вод животворных, церкви источник отверзл еси, аще кто жаждет, усердно да приходит и пьет, вопия Блаже.

От земли убо, на небо вознестися, проявление глаголаше, с небесе же Духа послати обетова Святаго.

Богородичен: **И**же естеством животворивый, иже от Девы родивыйся Господь, всем верным дарует безсмертие, яко Благоутробен.

Ин

Ирмос: Утвердися сердце мое во Господе, * вознесся рог мой в Бозе моем, * разширишася на враги моя уста моя, * возвеселихся о спасении Твоем.

Не иже на лице суд судите, иудее, уча глаголаше Владыка, егда прииде во святилище, якоже писано есть, преполовившуся законному празднику.

Не иже на лице суд судите, иудее: Христос бо прииде, Егоже нарицаху пророцы от Сиона грядуща и мир взывающа.

Аще и словесем не веруете, иудее, делом веруйте Владыки: что прельщаетесь, отмечающеся Святаго, Егоже написа в законе Моисей?

Аще мессии всяко подобает приити, иудее, Христос же прииде ныне Мессиа: что прельщаетесь, отмечающеся Праведнаго, Егоже написа в законе Моисей?

Слава, Троицен: Тебе поклоняемся, Отче, безначальный Существом, поем безначального Сына Твоего, и Духа благочестно Всесвятаго, яко единого три, естеством Бога.

И ныне, Богородичен: Един от Троицы сый быв, плоть виделся еси, не преложь, Господи, существа, ниже опалив Рождшия нетленное чрево, Бог сый весь и огонь.

Седален, глас 8-й.

Соя посреди святилища, * преполовляющуся божествене празднику, * жаждай взываше, да грядет ко Мне и пьет, * пияи бо от сея Божественныя Моея воды, * реки из чрева источит повелении Моих. * Яко иже верует в Мя, посланнаго от Божественнаго Родителя, * со Мною прославится. * Сего ради вопием Ти, * слава Тебе Христе Боже, * яко богато излиал еси воды Твоего человеколюбия рабом Своим.

Слава, и ныне.

Подобен: Премудрости:

Премудрости воду и жизни, источая миру, * всех, Спасе, призываеши почерпсти спасения воды: * Божественный бо закон Твой прием человек, * в себе уташает прелести углие, * отонудуже во веки не вжаждет, * ни престанет насыщения Твоего, Владыко Царю Пренебесный. * Сего ради славим державу Твою, Христе Боже, * прегрешений оставление просяще низпослати богато рабом Твоим.

Песнь 4.

Ирмос: Воздвижена Тя видевши церкви на кресте, * Солнца Праведнаго, * ста в чину Своем, * достойно взывающе, * слава силе Твоей Господи.

Растерзав смерти врата Своею силою, пути жизни сказал еси, и безсмертия двери отверзл еси, иже верую Тебе зовущим, слава силе Твоей Господи.

Преполовление всех и конец имея, и начало яко Безначален обдержа, стал еси посреди вопия, божественных, богомудрии, даров насладитесь.

Яко Бог всех держа власть, яко силен державу низложив смерти, послати обеща Христе Дух Святыи, иже от Отца происходящий.

Богородичен: Даеши богато благодать Тебе поющим, и иже из Тебе Рожьшагося Превечнаго Слова, Мати неискусомужная, и согрешением оставление, сим просящи Пречистая.

Ин

Ирмос: Пророк Аввакум умныма очима * провиде, Господи, пришествие Твое, * тем и вопияше: от юга приидет Бог. * Слава силе Твоей, слава низхождению Твоему.

Аще мессии подобает приити, Мессиа же Христос есть, беззаконнии, что не веруете Ему? Се прииде, и свидетельствует, яже Той творит: воду вино сотвори, расслабленного словом стягну.

Не разумеюще писаний, прельщаетесь вси вы, евреи беззаконнии: воистинну бо прииде Христос, и всех просвети, и в вас показа многая знамения и чудеса, и все отрицаетесь истиннаго живота

Едино дело показав вам, и вси уже дивитесь, взываше иудеем Христос. Вы обрезуете и в субботу человека, рече, Мене же что оклеветаете прочее, воздвигнаго словом расслабленного?.

Дела сотворих многая, и коего ради дела камением биете Мя? Иудеем Христос, обличая, взываше: еда зане человека здрава всего словом сотворих, не судите на лице человецы.

Во апостолах действующи, и во пророцех Сам почиваяи с Духом, безначальное рождение Отческаго естества Христе, языки к познанию возвел еси знаменъми Твоими.

Слава, Троицен: Троице нераздельная Единице, безначальне Отче, Сыне и Душе Святыи, во Единице Троица равночестная, сопрестольная, животворящая, несозданный Боже, спасай воспевающия Тя, и избави от бед и скорбей.

И ныне, Богородичен: Во чреве Твоем Бога неописанно вместившая, Богоневесто, Дево Мати Чистая, не престай молящи о нас, яко да Тобою избавимся от обстояний, к Тебе бо присно прибегаем.

Песнь 5.

Ирмос. Ты Господи ми свет, * в мир пришел еси, * во свет святых обраща, * из мрачна неведения, * верою хвалящих Тя.

Божественных праздник преполовление достигше, совершенное божественныя добродетели постигнути, потщимся богомудрии.

Яко воистину священно, настоящее торжество, преполовление бо великих праздник, повелевает и светится обоюду.

Богородичен: Ум ангельский не может разумети Твое не изреченное из Девы, и пречистое Рождество, Спасе мой Всесилне.

Ин

Ирмос: Господи Боже наш * мир даждь нам, * Господи Боже наш, стяжи ны, * Господи, разве Тебе иного не вемы, * Имя Твое именуем.

Чудесы украсил еси апостолы Твоя, дивесы возвеличил еси ученики, во всем мире прославил, Спасе наш, и дав им Царствие Твое.

Вся просветиша земли концы ученицы, чудесы и ученьми, и различными образы слово проповедавшие, Христе Спасе, Царствия Твоего.

Хвалу возсылаем Царствию Твоему, пение же Тебе приносим, нас ради на земли явившемуся, и мир просветившему, и Адама воззвавшему.

Слава, Троицен: Слава Тебе, Отче Святыи, Боже нерожденне: слава Тебе, Слове безлетне единородне: слава Тебе, Душе Божественне и сопрестольне, и единосущне Отцу и Сыну.

И ныне, Богородичен: Бысть чрево Твое святая трапеза, имущая небесный хлеб, от негоже всяк ядый не умирает, якоже рече всех, Богородительнице, Питатель.

Песнь 6.

Ирмос. Пожру Ти со гласом хваления Господи, * церкви вопиет Ти, * от бесовския крове очищися, * милостию от ребр истекшею Ти кровию.

Преполовление пятьдесятницы наста днесь: отсюда божественная убо Пасха, святая светится, просвещающи божественнейшею светлостию, от онуду же Утешителевою благодатию осиявающи.

Преполовление пятьдесятницы наста днесь: отсюда божественная убо Пасха, святая светится, просвещающи божественнейшею светлостию, от онуду же Утешителевою благодатию осиявающи.

Глаголаше в церкви Христе предстоя, иудейским собором Свою славу открывая, и предъявляя сродство к Родителю.

Богородичен: Буди ми Предстательница, и Стена нерушимая, от мирских мя соблазн избавляющи, едина Богородительнице, и божественным светолитием освещающи.

Ин

Ирмос: Яко воды морския, Человеколюбче, * волнами житейскими обуреваюся, * темже, яко Иона, тако вопию Ти: * возведи от тли живот мой, * Благоутробне Господи.

Вся содержай концы, возшел еси, Иисусе, и учил еси во святилици народы слову истины, празднику преполовляющуся, якоже Иоанн вопиет.

Отверзл еси устне Твои, Владыко, проповедал еси миру безлетнаго Отца, и Всесвятаго Духа, сродное обоих храня и по воплощении.

Дело Отчее совершил еси, дела уверил еси словеса Твоя, исцеления совершая Спасе, и знамения, разслабленного исправляя, прокаженных очищая, и мертвые воскрешая.

Безначальный Сын начало бысть прием, еже по нам вочеловечися, и посреде праздника учаще, глаголя: притецыте ко источнику приснотекущему, жизнь почерпите.

Слава, Троицен: **Е**дино в Троице Божество, Существо триипостасное, несозданное, нераздельное вси славим, Отца, и Сына, и Святаго Духа, яко три сущее, и едино.

И ныне, Богородичен: **Д**еву по рождестве поем Тя, Деву и Матерь славим Тебе едину, Чистая Богоневесто Отроковице, из Тебе бо воистинну Бог воплотися, обновив нас.

Кондак, глас 4-й.

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду бессмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Икос. **О**лядевшую ми душу согрешенми и беззаконии, кропленьми Твоих кровей напой, и покажи плодоносну добродетельми. Ты бо рече всем приходящим к Тебе, слово Божие пречистое, воду нетления почерпите, живу же и очищающую грехи, поющим славное и божественное Твое востание, подая Благии иже с высоты сошедшую воистинну учеником Твоим Духа крепость, Тебе Бога ведущим, Ты бо еси источник животу нашему.

Песнь 7.

Ирмос. **В** пещи Авраамския дети персьстей, * любовью благоверия паче, * нежели пламенем опаляеми взываху, * благословен еси в церкви славы Твоей Господи.

Крепость Спасе смертную разорь силою, стези жизни показал еси человеком, благодарно Тебе зовущим, благословен еси в церкви славы Твоей Господи.

Крепость Спасе смертную разорь силою, стези жизни показал еси человеком, благодарно Тебе зовущим, благословен еси в церкви славы Твоей Господи.

Плоть носяща видяще, не разумеша собори еврейстии слова Тебе Божия. Но мы Тебе воспеваем, благословен еси в церкви славы Твоея Господи.

Богородичен: **В**ышняго освященно Божие селение, радуйся. Тобою бо дадеся радость Богородице, вопиющим Ти, благословена Ты в женах, всенепорочная Владычице.

Ин

Ирмос: Халдейская печь, огнем распалаемая, * орошашеся Духом, * Божиим предстоянием, * отроцы пояху: * благословен еси, Боже отец наших.

Плотски потрудился еси, упокоение всех: волею вжаждался еси, источниче чудес: воды просил еси, воду жизни, Иисусе, возвещай.

Самаряныни, Господи, жене беседовал еси, обличая безумие беззаконных евреев: она убо верова Сына быти Божия, сии же отвергошася.

Воду живую истекающую, воду безсмертия, источник присноживущий подати обещал еси, верою Дух Твой приемлющим, Спасе, от Отца происходящий.

Пятьми хлебы препитал еси, тысящи алчущих, и насыщения останки, в друтия тысящи, Спасе умножил еси, показуя славу Твою священным учеником.

Ядый Тело Твое, жив будет во веки, и пий Кровь Твою, в Тебе пребудет, Спасе мой, и Ты в нем пребываеши, и воскресиши его в последнее мгновение.

Удивил еси, Владыко, Твое смотрение, уверив чудесы Божественную власть, недуги изгнал еси, мертвыя воскресил еси и слепыя просветил еси яко Бог.

Прокаженные очистил еси, хромые исправил еси, расслабленные стягул еси, кровоточивую исцеливый: шествовал еси по пучине, показав славу Твою священным учеником.

Слава, Троицен: **П**оклоняемся Твоему, Господи, Пречистому Отцу, и благодати Духа, юже Твоим апостолом Бог сый раздал еси, посылая их на проповедь.

И ныне, Богородичен: **В**о чреве Твоем вместила еси невместимаго Слова, от Твоих сосец доила еси миру Питателя, на объятии носила еси Содержителя нашего, Богородительнице Чистая.

Песнь 8.

Ирмос. Руце распростер Даниил, * львова зияния в рове затче: * огненую же силу угасиша, * добродетелию преноясавшися, * иже благочестия любителие отроцы взывающе, * благословите вся дела Господня Господа.

Красен из гроба востав, Своею Божества славою сияя, апостолом Своим Господи явил еси Духа обещание, тем посылая действо, благословите вся дела Господня Господа.

Умертвив ада яко Бог, Живоначальниче, всем источил еси живот вечный. Его же ныне воображают светлейше, светоносных дней сих, радостно вопиющим, благословите вся дела Господня Господа.

Лучы яко солнце Христе правде явися, заря миру послал еси апостолы Своя, носяща Тебе света безсеменного, и неразумия мглу очищающая, вопиющим, благословите вся дела Господня Господа.

Богородичен: Се ныне оскуде яве, от иудина племени князь и вождь: Ты бо Всененорочная родила еси, прежде обещавшаго обетования, иже Христа Бога поющим, благословите вся дела Господня Господа.

Ин

Ирмос: Ангели и небеса, * на престоле славы сидящего * и яко Бога непрестанно славимаго, * благословите, пойте * и превозносите Его во веки.

Приидите видите, людие, на престоле славы воспеваемого, от людей беззаконных хулимаго, и видяще пойте в пророцех Мессию предреченнаго.

Ты еси воистинну Христос, в мир сей пришедый, из Негоже спасение и оставление отеческих согрешений: Ты еси воистинну живот, в Тя веровавшим.

Премудрость Божия, преполовившуся празднику, якоже писано есть, во святилищи предста и учаще, яко воистинну Сей бже Мессия Христос, Имже спасение.

В субботах Христос, и по вся дни показоваше знамений дела, исцеляя сущия в недугах различных: но прельщеннии людие яростию распыхахуся.

Разслабленнаго, глаголет, в летех же мнозех лежащаго, в субботу Сей исцели, и преступи закон, иудеи Христа горько укоряху.

Не Моисей ли вам, закон давый, повелевает обрезатися, и в субботу мужа обрезуете, да не како закон отеческий разорится, Христос иудеем глаголаше.

Неблагодарни всегда в пустыни жившии, Благодетеля завистию прогневаху, хуляще, движуще неправедныя языки, тщетным поучающиеся.

Благословим Отца, и Сына, и Святаго Духа, Господа.

Троицен: Един Бог убо Троица, Отцу не преступившу в сыновство, ниже Сыну преложшуся во исхождение: но свойтвенная и обоя, Свет Бога, три прославляю во век.

И ныне. Богородичен: Како родила еси, рцы, от Отца безлетно просияващаго, и со Святым Духом воспеваемого? Или яко весть един благоволивый из Тебе родитися, Богородице.

Честнейшую: не стихословится.

Песнь 9.

Ирмос. Камень нерукосечныя горы, * от несекомыя Тя Девицы, * краеугольный отсечеса Христос, * и совокупив разстоящаяся естества: * тем веселящися, Тя Богородице величаем.

Новому и чистому житию, от Христа научившися, сие даже до конца сохранит, полезно вси потщимся, яко да Святаго Духа пришествие примем.

В небесное паки житие звани бывши, ходатайственною силою, излиывшагося даже до рабья образа, и нас вознесшаю, Сего достойно величаем.

Ты мое смертное Живодавче, обложением безсмертия, и нетления благодатию оболк Спасе, воскресил сей, и Отцу привел сей, временную ми разрушив брань.

Богородичен: Яко корень источника, и вину нетления, Тебе Дево вси вернии уведевше, похвалами почитаем. Ты бо составное бсзсмертие источила еси.

Ин

Ирмос: Чужде матерем девство, * и странно девам деторождение: * на Тебе Богородице, обоя устроишася. * Тем Тя вся племена земная * непрестанно величаем.

Празднику преполовляющуся иудейскому, возшел еси, Спасе мой, во святилище Твое, и научал еси всех: чудяхуся же иудее, и откуда Сей вестъ письменна не научився, глаголаху.

Исцеления дарований Избавитель мой источая, сотворяше чудеса и знамения, прогоня недуги, целя немощствующия: но иудеи неистовствовахуся множеством чудес Его.

Непокоривыя иудеи Избавитель мой обличая, вопияше: не судите на лице, но праведен суд судите: ибо закон и в субботу обрезоватися повелевает всякому человеку.

Большая чудес учеником Твоим, Спасе, якоже обещав, подал еси, послав в языки проповедати славу Твою: они же мирови проповедаху Твое Воскресение, благодать и воплощение.

Аще человека обрежете в субботу, да не како разорится закон: ныне на Мя что гневаетесь, яко человека всего здрава сотворих словом? По плоти вы судите, глаголет иудеем Христос.

Сухую исцеливый руку словом, изсохшую древле землю моего сердца, исцелив Слове, покажи мя плодоносна, да соделаю и аз Спасе, плоды в покаянии тепле.

Прокаженное мое сердце очистив, и души моя, Слове, очи просветивый, на одре болезни мя лежаща исправи, якоже расслабленного возставил еси на одре лежащаго.

Слава, Троицен: Чужде есть беззаконным славити безначальную Троицу, Отца, и Сына же, и Святаго Духа, несозданное вседержание, Имже весь мир создася державою крепости Ея.

И ныне, Богородичен: Вместила еси во чреве Твоем, Дево Мати, единого от Троицы Христа Жизнодавца, Егоже поет вся тварь, и трепещут горнии престолы: Того моли, Всеблаженная, спасти души наша.

Светилен.

Подобен: Небо звездами:

Жаждай взываше, да грядет ко Мне и пьет, * пияи бо от сея Божественныя Моея воды, * реки из чрева источит повелении Моих. * Сего ради вопием Ти, * слава Тебе Христе Боже, * яко богато излиал еси воды Твоего человеколюбия рабом Своим. [Дважды.]

Слава, и ныне: тойже

На хвалитех стихиры на 4, глас 4-й:

Подобен: Яко добля:

Премудрость, и сила, Отчее сияние, Слово присносущное и Сын Божий, во святилище прииде плотию, и учаше иудейския люди, жестокия и неблагодарныя, и удивляхуся премудрости богатству, вопиюще: откуда весть писмена, ни от когоже учився? [Дважды.]

Книжником затыкаше уста, иудеи обличаше Мессиа Господь, вопия к ним: не на лице законопреступницы, яко неправеднии судите, в субботу бо Аз разслабленного воздвигнух. Темже Господь субботы есмь и закона, что ищете Мене убити, умерших воздвигшаго?

Навуфеа камением побиша, лютии и законопреступнии, иудейское собрание неблагодарное: Исаию же пилою древяною растроша, в кал мудраго Иеремию ввергоша, Господа же на Крест вознесше взываху: храм разоряй, спаси Себе, и уверуем.

Слава, и ныне, глас 4-й:

Просветившися братие, Воскресением Спаса Христа, и достигше преполовления праздника Владычня, приискренно сохраним заповеди Божия, да достойни будем и Вознесение праздновати, и пришествие получитьи Святаго Духа.

Славословие великое. По Трисвятом, Тропарь, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

Ектении, и отпуст. И час 1-й.

В СРЕДУ 5-Й СЕДМИЦЫ ПО ПАСХЕ На Литургии

Блаженна обоих канонов, песнь 9-я.

Новому и чистому житию, от Христа научившеся, сие даже до конца сохранит, полезно вси потщимся, яко да Свягаго Духа пришествие примем.
[Дважды.]

В небесное паки житие звани бывши, ходатайственною силою, излиывшагося даже до рабиа образа, и нас вознесшаю, Сего достойно величаем.

Ты мое смертное Живодавче, обложением безсмертия, и нетления благодатию оболк Спасе, воскресил сей, и Отцу привел сей, временную ми разрушив брань.

Празднику преполовляющуся иудейскому, возшел еси, Спасе мой, во святилище Твое, и научал еси всех: чудяхуся же иудее, и откуда Сей весть письменна не научився, глаголаху.

Исцеления дарований Избавитель мой источая, сотворяше чудеса и знамения, прогоня недуги, целя немощствующие: но иудеи неистовствовахуся множеством чудес Его.

Слава, Троицен: Чужде есть незаконным славити безначальную Троицу, Отца, и Сына же, и Святаго Духа, несозданное вседержание, Имже весь мир создася державою крепости Ея.

И ныне, Богородичен: Вместила еси во чреве Твоем, Дево Мати, единого от Троицы Христа Жизнодавца, Егоже поет вся тварь, и трепещут горнии престолы: Того моли, Всеблаженная, спасти души наша.

По входе тропарь праздника, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

Слава, и ныне: кондак, глас 4-й:

Подобен: Вознесыйся:

Празднику законному преполовляющуся, * всех Творче и Владыко, * к предстоящим глагола еси, Христе Боже: * приидите и почерпите воду безсмертия. * Темже Тебе припадаем и верно вопием: * щедроты Твоя даруй нам, * Ты бо еси Источник жизни нашея

Прокимен апостола, глас 3-й:

Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 32. [Деян. 13, 13–24.]

Во дни оны, отвезшеся от Пафа Павел и сущии с ним, приидоша в Пергию Памфилийскую: Иоанн же, отлучився от них, возвратися во Иерусалим. Они же, прошедше от Пергии, приидоша во Антиохию Писидийскую, и вшедше в сонмище в день субботный, седоша. По чтении же закона и пророк, послаша начальницы сонмища к ним, глаголюще: мужие братие, аще есть слово в вас утешения к людем, глаголите. Востав же Павел и помаав рукою, рече: мужие Израильтяне и боящияся Бога, услышите: Бог людей сих избра отцы наши и люди вознесе в пришельствии в земли Египетстей, и мышцею высокою изведе их из нея. И до чотыредесяти лет препита их в пустыни. И низложив язык седмь в земли Ханаанстей, даде им в наследие землю их. И по сих, яко лет чотыреста и пятьдесят, даде им судии до Самуила пророка: И оттуду просиша царя, и даде им Бог Саула сына Кисова, мужа от колена Вениаминова, лет чотыредесять. И преставль его, воздвиже им Давида в царя, емуже и рече свидетельствовав: обретох Давида сына Иессеова, мужа по сердцу Моему, иже сотворит вся хотения Моя. От сего семени Бог, по обетованию, воздвиже Израилю Спасение, Иисуса: Проповедавшу Иоанну пред лицом внития Его крещение покаяния всем людем Израилевым.

Аллилуиа глас 1-й: Помяни сонм Твой, егоже стяжал еси исперва.

Стих: Бог же Царь наш прежде века, содела спасение посреде земли.

Евангелие Иоанна, зачало 18. [Ин. 6, 5–14.]

Во время оно, возвед Иисус очи и виде, яко мног народ грядет к Нему, глагола к Филиппу: чим купим хлебы, да ядят сии? Сие же глаголаше искушая его: Сам бо ведяше, что хочет сотворити. Отвеща Ему Филипп: двема стома пенязь хлебы не довлеют им, да каждо их мало что примет. Глагола Ему един от ученик Его Андрей, брат Симона Петра: есть отрочищ zde един, иже имать пять хлеб ячменных и две рыбы: но сии что суть в селико? Рече же Иисус: сотворите человеки возлещи. Бе же трава многа на месте. Возлеже убо мужей числом яко пять тысяч. Прият же хлебы Иисус, и хвалу воздав, подаде учеником, ученицы же возлежащим: такожде и от рыбу, елико хотяху. И яко насытишася, глагола учеником Своим: соберите избытки укрух, да не погибнет ничтоже. Собравша же, и исполниша дванадесяте коша укрух от пятих хлеб ячменных, иже избыша ядшим. Человецы же видевше знамение, еже сотвори Иисус, глаголаху: яко Сей есть воистинну Пророк, грядый в мир.

Вместо Достойно: ирмос, глас 8-й:

Ирмос: Чужде матерем девство, * и странно девам деторождение: * на Тебе Богородице, обоя устроишася. * Тем Тя вся племена земная * непрестанно величаем.

[В прочия же дни поем: Светися: и до отдания.]

Причастен: Ядый Мою Плоть, и пияй Мою Кровь, во Мне пребывает, и Аз в нем, рече Господь. Аллилуиа, [трижды.]

И отдается праздник. Служба Миней поется на Повечерии.